

Nepomuk Gaschi

Ausschnitte aus dem Programm 2006

Alle Vögel sind schon da,
vum vögla kasch kei Grippe ha
am Obig ins Welschdörfli go
ohni Angscht teysch Grippe überko
Viagra kriagsch und a Gummiding
Tamiflu dazua und denn gots ring.

Churer Promis dia Oberschlaua
Ins Quaderies hens Nägel khaua
Doch z'Fernseh tuat do drüber schwiega
Au in dr Zytig wird nüt gschriebe
Us Angscht si törfen nümma go
An z'Räbers Kino Apéro

A Bär isch in d'Schwiiz inna cho
Und alli händ Camra füra gno
Dr Bundesrot het sich befasst
Am Bär hätt dä Rummel nümma passt
Vili Fotis sind für dä Bär a Qual
Är isch nid dr Renzo Blumathal

Werbig bringt iara zwenig Geld
Sie will wieder zugg in Tenniswelt
Si isch wider uf der Tennistuur
Benümmt sich hüt no wiana Puur
Vor Sie will griffa, nach da Sterna
Söll dia Baaba richtig reda lerna

Häsch vur Alta gnuag übercho
Wetsch di drum no scheide lo
Doch du gsiesch denn gopfriedstutz,
für an Awalt langet nid dr Stutz
Denn henn miar d'Lösig do parat
Schick Sie uf Tschiertscha an a Pilzsalat

Songs wia Kändel in the Wind
Kennt bis üs hüt jedas Kind
Dä Sängler mit dr geile Brilla
Vöglet ohni Gummi oder Pilla
Muas kai Angscht vor Nachwuchs ha
Denn sini Frau isch halt a Maa

Dena Türke hemmers richtig zeigt
Miar händ Sie us dr WM keit
Drum hauens üs dr Buckel voll
Und findens au no fär und toll
Doch miar hend das schnell vergässa
Und tüen im Stadion Kebab fressa

Fiinstaub, isch as Modewort
Mit Holz go führa das sig Mord
Servela brötla isch verbie
Kei me offas Fürli gits am Rhy
Dr Gevag git das nüt z'studiera
Tütscha Kehricht z'importiera

In jedem Gässli isch Radau
Am Wuchaend sind Teenis blau
In dr Altstadt schiffa und ummakotza
In jedem Eck an Polizischt amotza
Das isch varbi a heissi Sach
Hüt wirsch per Video überwacht

Dr Tömu Lüthi isch üsere Held
Dr Titel bringt im s'grossi Geld
Dä jungi Maa rast schnell ins Ziel
Fürs Skiteam chönt är Vorbild si
Statt schalta bis in füfti Gang
Klääbens fescht am steilschte Hang

Neui Wiisig kunnt vum Bund
Nid jeda kann me ha a Hund
Ob Pudel oder Dobermann
A Hund isch nit für jedermann
Zum Hünd usführa sisich zum Lacha
Muasch jetzt denn no a Prüafig macha